


www.BibleForChildren.org

Mateo 26



Ocaratapojaquegueti
6 savincaguiteri
arejetantapojaquempaca
Paashicoa, iriraquea
Jesoshi yoanaquequea
Vetaniaqui iguintenitaguete Irasaro
metojavetanquitsica yovochantajica.



Ariquea
ocoraquepojaquequea
Maria amacotaquequea
apanaquitiro
vegaramajatanquitsica
casancajencajatatsica
ipeantajitaroca naarero, tee
inconoajatantajitemparoji otsipaja.



Oshaguitancariquea
iguitiqui Jesoshi,
iroompa oshetantavacariquea
omae. Ariquea ocotanaca
oponcajajencatanaquequea
otsitacajencatanacaro tsovironaqui.



Ariquea yoanaque Jorashi Ishicariote
iramenajiaquiteriquea saserorotejia
anaantajianquitsica incantajiaquiteri
ininquequea iraacaantaqueri
Jesoshi. Irioveca itsatacaane
carajianquitsica 12.

Iriatimpajia
ishinejianacaquea
icanqueriquea
irojocajiaqueneri
imentaquipae.



Iriraquea Jorashi yoanaji, iroompa
ariquea iquenquejanaquequea
queroca incoquerini
iraacaantaquerigueti.



Ariquea yoayoaitanaque
itsatacaanejia
itampaticamajajiaqueroquea
icantajiavaquerica Jesoshi,
inetsanajiaqueroquea maasanopae
irishecajiaquempaca
irishineventajiaquemparoniji
Paashicoa. Iroompaquea
ishecajiacagueti,
yaaqueroquea
Jesoshi pan,
yamanaqueriquea
Aapani Irioshi,
icantaqueri:
"Arioteesaa."




Ariquea icotarejitsitaroquee
yojocajiaqueneri itsatacaanejia,
icantiriquea: —Paajiavaqueja
pishecajiavaquemparo. Iroguenti
notsino. Iroompa yaacoqueroquee
chovintyorigui, yamanajiri aisa
Aapani Irioshi, icantaqueri:
"Arioteesaa."




Ariquea yojocacojiaqueneriquea
itsatacaanejia, icantiri:

—Jero pimirajiavaquemparoja,
maasano. Iroguentiquea
noriraja sotojaatananquitsineca
nometojaventajiaquerigueti
caramirincavaetananquitsineca
impeacotajemparonijite Aapani
Irioshi igovaeguisherejia.


Ocantacoqueroquea
iroaqueraro
paaquito.




Iroompaquea icanque Amajirote aisa: —Shimo,
Shimo, irira Satanashi yamanaqueri Aapani
irishinequeriniji inquempetacaajiaquempiniji
aviatimpajia yatecacojitirogueti tirigoitsoqui,
iramenantajiaquempiquea arimajacaca
pitsaromentamajataquena.



Cotanquitsiquea naatimpa namanacovenquempiquea
aviatimpa aatonijite pipeacomajatanajarotsi
pitsarovenquenaguete. Ariquea
pimpeacovequitenaquea, cotanquitsiquea
pincoraquetashitajenaguete, noninque
pintampishitacaajiaqueriquea
papitsaromentarijiate.



Icanque Shimo: —Nomajirote,
noanaquequea naatimpa quisho noacotantanaquempi,
irisantanatacojiquempigueti inquejetacaajitsitenaquea
naatimpa, aatoquea notsinampirejimpitsi. Irooca
irimetojajiquempiquea inquejetacajaiquenaquea
naatimpa aisa. Icanqueriquea Jesoshi:—Peerero,
noncanquempiquea, coajica
tequerataguete
irinijeji chaapa,
pomanacoquenaquea
3.



Iroompaquea
yoayoaitanaquequea
Jetsemaniqui. Irooquea
yarejerejeipojacaguete
iriraquea Jesoshi
icanqueri itsatacaanejia:
—Pisavisaviitetaja ocaniqui,
naatimpa noanaquetajate
ontaniqui namanaquiterita
Aapani. Oraquea
yamanaqueriguete
icanqueriquea: —Aapani,
pagavejaquequea
maasanopae.



Imaica nonintaveca
paapitsatenarojate
nantsipequempaca,
cotanquitsiquea
teequea nonintenica
onetsanaquempa nonintica
naatimpa, iroguentiquea
pinintica aviatimpa.



Ariquea icoraquepojaquequea Jorashi itsipajiacari
oshequini coaretapae Iromaquitica jerijia aisa
coaretapae quempoguijajiguiroca teemporo
itigarancajiaqueca pariseojia aisa
saserorotejia anaantajianquitsica.
Yamajiapojaquequea
yashimirintantajigaca jeriquea
aisa itsivotantajiacaca.
Aparo itsatacaane
icaratavaqueri
yashintacaca
saserorote
anaantamajatanquitsica,
iguempitarejitsitari iguempita
itincamijempequiquitica.



Cotanquitsiquea Jesoshi icanque: —Ariotaquetsija
icocani. Ipamitsitajariquea iguempitaqui, jac
peamajatanaja.



Ariquea yajiricajiaqueri Jesoshi, yaanaqueriquea
itsovironaquitequi saserorote
anaantamajatanquitsica.

Iriraqea Peerero
yoguijatacovetanacari
cotanquitsiquea
impoivaetapojaque.



Ariquea oraniqui itsitacajiaque paamari niganqui
pampatejijaniquiqui itsovironaquitequi, savisaviitaque
itajiaque yanquitacojiacarouea.

Iriraquea Peerero
iconoajiapojacari
isavicapoji.



Ariquea ichoocaque
oraniqui ijitica
iguempitarejaqueca
Peerero. Iriguentiquea
irajaanire saserorote
anaantamajatanquitsica,
icoacotsitariquea iriatimpa
aisa icantiri: —¿Aviroca
namenaqueca
pitsipatacarigueti ontaniqui
panquirentsimashiqui?



Ariquea yapijitajiro
Peerero yomanajiro,
icanquitiguiquea
imaica
inijanaque chaapa.
Icatiitsitapanajantaquea
isotoapanajanti,
iraitsitancaquea
ishimampo jancamajatanaca.




Jero maasanojia icatintiijianaca
yoayoaitanaque yaajianaqueriquea
Jesoshi Piratoqui. Iriraquea Pirato
icanqueriquea: —¿Arimajaca
aviguenti Imajirote jorio?
Icanquequea Jesoshi:
—Tampatica poaquero.



Iiriraquea Pirato inintaveca
iroguipaquijajerimequea
Jesoshi, icantsijiajariquea
aisa. Cotanquitsiquea
iriatimpajia arimpaquea
icajemajianaquequea:
—iPompajacoteri!
iPompajacoteri!




Ariquea icantajiaqueriquea
Pirato irompajacojiaqueriquea.
Iriatimpajia yaajianaqueriquea.
Ariquea inatanaquero Jesoshi
igoroshite, isotoanaque
iroanaque ontaniqui
icantajitirogueti Shocoitontsi.
Oraquea evereotsaqui opajita
Gorogota.



Ariquea oraniqui
yompajacojiaqueriquea,
itsipatacaantajiacariquea mavite,
apaniro yogatiacojiqueri
itincamijempequiqui
Jesoshi,
iriraquea itsipa
irajampatequi.



Teequea irivoreitsitajempaji catsirincaiteri.
Iroompaquea oraquea omorena ticaamorenatanquitsica
teemporoqui jocagatsica aatonijite iquijajitiro
intsompoguiremajacaqui, ariquea opecotarejanaque
tampaticaquea niganquisano
ocantanaque sarararararara.
Iriraqeua Jesoshi
icajemapanaquantiquea
inirojencamajaca icanca,
icanque: —Aapanii,
paavajeroja noshire.
Irooquea icanquegueti
imaica, ariquea
imetojanaque.



Iiraquea Jose Arimateaqueitica,
iriguenti anaantatsica
iguejemajirore joriojia,
itsipajiacari imajirotepae
icapiocapinijiacaguetei.

Yoguijaqueriquea

Aapani Irioshi

impeaquempaguetei

Imajirojiate

maasanojia.

Iriatimpa teequea

intsarogueji,

yoashitanaqueriquea

Pirato icanqueriquea

ininque irajaitanajero

itsino Jesoshi.



Irootarite yoantanacaca Jose
ivegarataquitiquea iniromorena
shipetari. Iroompa yoanaque
itsopajacotajatiri,
yampiguiricantajiacari,
yaanajiriquea
ontaniqui
yojoquijitajatiri
imperitamoroqui

imorotashijitirigueti
metojatsica.
Itigaritashitantacari
iniroshimentapiri mapi,
iticaacotantacari.



Iroompaquea
osavincaguitetanaquegueti
imagorejantajitaca,
iriraquea saserorotejia
anaantajianquitsica
aisa pariseojia
yoayoaitanaquequea
iramenajiajateri
Pirato.



Icantajapojiri: —Nomajirote,
noquenquejajiajiroquea
icanqueca irintatica
amatavijantatsica
anijatirajaguetei,
icanquequea:
'Aapojajempaguetei
3 savincaguiteri



nompochatanajequea.'



Iriatimpajia yoayoaitanaque
yojoquijitaquerigueti
Jesoshi, iseyotsitaro
mapi ...



... yashatirijacotantajicarica,
ariquea icantajiaqueri
coaretajia ...




... inquempoguijamajaqueroja
aatonijite quericaca
coraquetashitimatiritsi.



Ariquea anaanacaguete
imagorejantajitaca,
osavincaguitetamanaji
pariapojaroca semana,
oraquea Maria
Magararaquitica aisa
otsipa Maria
oahoaitanaquequea
amenajajatero

yojoquijitantajitacarica.



Oraquea tequeratagueti
arejerejeitempaji,
omoguecanaquequea
quepatsi moguec moguec
moguec, icoraquepoji
irashivantite
Amajirote
iquenapojiquea
inquitequi.



Itigaritapojiro mapi
iticaacotantajivetacarica
Jesoshi, isavicapojiro.
Irirajia
coaretajia irooquea
yamenajivaquerigueti
ariquea
icohicoitanaca

itsaroamajianaque
yompioncajianaca
pion, pion, pion,
itejatejaitanaquequea
ijatacojiaquiti.



Iroompaquea arejerejeivetapojaca
manquigarentsi, icantajiguiro
irashivantite Aapani
Irioshi: —Aatotarite
pitsaroajiguitsi.
Notsaquequea
iriguenti
pamenaguetaje
Jesoshi

yompajacojivecaca.



Cotanquitsiquea teequea
inchoocatajeji acaniqui,
pochatanaji, aritarite
icanque iriatimpa
tequeratagueti
irimetojeji.
Intsijate
caacatejate

pameneroja
yojoquijivecarigueti.



Irooqea oquemajiavaquerigueti
otsaroajianaqueqea,
cotanquitsiquea oshinejianaca
aisa. Ocampanajantatigui tapoc
oshintsijianaji
oncamantapojaqueri
itsatacaanejia.



Iroompaquea itonquivojajiacararo
Jesoshi quenavoquirontsiqui
icantajivaquero: —¿Choocampi?
Oquempejiquempejiitanacari
ajiricaguititsitari
otsaromentanacari.





Iroompaquea ishecajiacaguete itsatacaanejia
carajianquitsica 11, yonigaimojiajariquea Jesoshi.

Ariquea icantomajajiaqueri yamenaqueguete
manaquea iquishoshirentavaetanaque, teetarite
inquemisantajigueriji cantajiavecarica
amenajiavecarica ipochatanajiguete.

Iroompaquea iteroncanaqueroguete Amajirote
Jesoshi iquenquetsatacaajianajiriguete
itsatacaanejia, yatsomajanaja yoanaji jenoqui
inquitequi isenampijapojajari Aapani Irioshi
isavicapojaji itincamijempequiqui.



Aapani Irioshi caaviji ipintsamajatari
maasano caquintejiatsica,
irootaquequea ipantajiacarica
Irijanite irapatiroritsite
irimetojaventajiaqueri, ...



... aatonijite ipejaijaa maasano
aventajiaquemparineca,
incoguitempaniqueate
iranijajiaje.



Iromaquitica 3:23 Aritarite icovaeguishejiaca maasano,
tee inchoocateji moncarateroneca iroganejencare
Aapani Irioshi.

Iromaquitica 6:23 Oraquea irivegaratantajitaquemparica
peacaacaroca covaeguisherentsi, iroguenti metojanentsi.
Cotanquitsiquea ora irojocashijiaquenerica Aapani
Irioshi tsipashirentajiaquemparineca Amajirote
Quirishito Jesoshi, iroguenti anijagantsi, incoguitempani
iranijaguiteni.

Evereojia 9:27 Maasanomajaca caquinteguetatsica
imetojimaque aparo, iroompaquea incanque Aapani
Irioshi queri oanajatsineca inquitequi, aisa queri
oananquitsineca camorecariqui.



Epesoquitica 2:8,9 Inchiquiojitaquea
icavintsajajiaquempiquea Aapani Irioshi
imeshiajiaquempiquea paventajiacarigueti Quirishito,
pamenajiaquetarite arimaja imetojaventajiaquempi.
Teequeate inchiquiojitsita pimeshiajiguempaji,
inchiquiojitsitarite inintaquequea iriatimpa
irimeshiajiaquempi.



Iromaquitica 10:9,10 Tee onchoocateji
ampeacaguempaca aatimpa ameshiantaquempameca,
arimequea aventacoquemparomequea. Pincanquegueti
pivagantequi: "Jesoshi iriguenti Majirontamajatatsica",
aisa pintsashirentamajaquegueti iroomajaca ivochatajiri
Aapani Irioshi imetojavecagueti, ariquea iroguenti
irishetacotaquempiquea Aapani Irioshi. Irootarite
ashire antsashirentantamajaquempaca iroomajaca
aventaguitempariniji irigomajaretacaantajicajica, aisa
irooquea avagante ancantantempaca: "Iriguenti
Majirontamajatatsica", irishetacotantajiacajica.



Joanca 3:16,17 Aapani Irioshi caaviji ipintsamajatari
maasano caquintejiatsica, irootaquequea ipantajiacarica
Irijanite irapatiroritsite irimetojaventajiaqueri,
aatonijite ipejaijaa maasano aventajiaquemparineca,
incoguitempaniqueate iranijajiaje.

Teenica irooqueea intigaranquimentera Irijanite acaniqui
quepatsiqui incantacaantajiaqueriqueate caquintepae
iroajianaque camorecariqui, iroguentiquea
itigaranquimenqueri iraajiajateri.



1 Joanca 5:11-13 Jero icanqueca itsavetanquerigueti:
Aapani Irioshi yojocajiacaji anijagantsi coguitatsineca,
oratica anijagantsi ochoocaqueri Irijanite.

Iriraquea ichoocaqueca Irijanite Aapani Irioshi,
ochoocaqueri anijagantsi; iriraquea caarica ichoocati
Irijanite Aapani Irioshi, tee onchoocateriji anijagantsi.

Notioncajianquempi maasano aviatimpajia
quemisantajiguirica Irijanite Aapani Irioshi
cameetsanijite pintsatimentajiaquenijite
yanijacaajiajimpi pishirequi pincoguitempani
pinchoocajiaque.



Mateo 26-28; Irocashi 22-24; Joanca 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Caquinte Bible (cot) © 2005, Wycliffe Bible
Translators, Inc. All rights reserved.

<https://live.bible.is/bible/COTTBL/MAT/1>

©2024 Bible for Children, Inc.

www.M1914.org

www.bibleforchildren.org

